

Co sul mougni.

On n' put nin dner tôte a Arthur ki s' plint ku l' polucion est pa tt' avâ èt k'ça fwêt dja des années k'on vike avu.

Et a vèy coumint k' ça va, ça pôrot co dèrer in bokèt. C'est bin chûr ku dins toutes les conserves d'anute, c'est plin du E du toutes lès sôrtes. Dins les E, gn è kékes potabes , mès ossi des mwês èt des fwârt mwês. Les lisses a sont counûes. A nôs fames du wêti cè k'ile achatat. Fât dire ossi ku tous ces E la sont rpris dins des arêtés et k'on n' fwêt nin cè k'on vut avu. Lu hic, c'est d' vèy si les controles sont bin fwêts.

D'ène ôte costé, les fames n'ont pus wêre lu timps d' fwêre leu courti, û don bin, ça nulz î dit pus rin èt ttafwêt rpassé a plouîzes. Dins nôs viadjes, dj'ans co la chance ku tchèkin rutoûne co in ptit bokèt pou s'ahiver d' lègumes et d' cartouches et k' les bwates nu sont nin s' la tâle a tous les r'pas.

Si on va dins les grandes boutikes, èyu k'on mougne mèyeu martchî k' al mājōn, ça n'est chûr pus parèy. Pou vinde bon martchî, fât acheter co mèyeu martchî et fwêre créchu des lègumes, des froûs û alver des cokés a 25 frs. du kilo n'est possibe k'a trignôdant dins les tourtôs.et dins tout l' rèsse. C'est coume ça k'onz è yu l'afwêre dul dioxine et dul sote vatche.

Èstant dins l' mèsî, dju dos cand min.me dîre ku lu ptit mon.nî k'est sèrieu et k'è sougne du ses pratikes, n'inture nin dins ces combines la. Èt mî k'ça, i n'fwêt pont d' granulés. On put vèy dins ses mèlanges toutes les danrées ki sont ddins. Tout est moustré et c'est bramint pus chûr pou toutou..

L'ôte afwêre ku dj' è a dire, c'est k' les biêsses mougat mî k' l' oume. Dju vus dire ku leu racion est calculée dins l'intèrèt d' leu santé et k' c'est justumint par la k'on dot ariver a les-î fwêre duner ène boune produccion du laçê û d' tchâr.

L'oume, du s' costé, surtout l' cî ki marède a l'uch, mwindje surtout cè k'il in.me bin, sins sondjî pus lon èt c'est la k' les fames duvat rdrèssî la bâre dins leus menus al mājōn.

Parèy pou les afants ki mougat a scole. Ou ministère, on wêtrè si les pavés sont bin nètîyîs, s' i n' trin.ne rin dins les ârmêres, si on n' dépanse nin d' trop, mès on s' fout pas mal du c' k' on dène às afants, s'il ont dès bons lègumes tous les djoûs, s' i mougat assez des froûs, s'i n' su gavat nin de coca toute la djoûrnée et n' rin mwindjî a midi.

C'est a tout ça k' i fât wêti. C'est nosse comportemant k'est bin souvint a rvèy.